

Լենինականի կոմկուսը գրում է Երեւան: Երեւանի կոմկուսը գրում է Կ. Կ.ին. Կ. Կ.ն գրում է Լենինական. Լենինականը գրում է մօտաւոր դիւրը. ասենք, Ղուրդ-Օղլու, Կոմերիամիութեան: Կոմերիամիութիւնը որոշում է միջոցներ ձեռք առնել. «մի քիչ հուպ տար»: Ղրկում են աւանակի մէկը: Աւանակը գալիս կանգնում է Որբերի Գիւղի ծայրում, մի քանի հոգի կանչում, փսիսում, խոստումներ անում, արձանագրում, պաշտօններ բաշխում եւ հեռանում:

— Ուզում են ինձ հեռացնել, որովհետեւ ազգային զգացում եմ տարածում,— ասում է փոքրիկ, մաշուած, նիհարցած մի մարդ, որ ուսուցիչ է աշտեղ: —Տղաները ինձ դէմ են հանել, բայց ամերիկացիները հասկացել են, պինդ են բռնում:

Խեղճութիւն... .

Նախկին ցարական պաշտօնեան չլսել է ձեւացնում եւ, վարիչի յետեւից վազելով, հիւսնում է, ոգեւորւում եւ կոտորուած Փրանսերէնով իր յարգանքները յայտնում:

Նայում եմ շուրջս, մտածում. մարդ ուժ ունենայ, այս տղաքը ժողովի, աւազակախումբ կազմի, եւ լեռ բարձրանայ: Լեռ չկայ, թալանելու էլ տեղ չկայ ու վրէժը ումնի՞ց առնես... .

Որբերի Գիւղի մասին շատ էի կարդացել: Դա՞ է նոր կեանքը, դա՞ է Հայաստանը... .

* * *

Ահա պիտի մեկնենք: Մի քիչ յետոյ, զանգը պիտի տան, «գիւղը» սեղանատան մէջ պիտի ժողովի եւ խաչած գետնախնձոր կամ լուբիա պիտի ուտի: Պիտի քաշուին տները, մէկ մէկից գրուած պիտի նստին, երես երեսի նային, յօրանջեն: Պիտի պառկին եւ մէկ կողմից միւսը դառնալով, ժամեր, ժամեր պիտի հառաչեն, օ՛խ քաչեն, վա՛յ քաչեն:

Միւս օրը, բորոզանը պիտի նուագէ, պիտի նորից վեր կենան, անկողին շինեն... .

Եթէ լաւ խորհենք, որբերի այս կեանքը մի տեսակ իդէալ է, որ մեր իմաստակները ուզում են ընդհանրացնել ու տարածել ամբողջ աշխարհի վրայ:

Նախ, ամէն մարդ պէտք է մտածէ միակերպ: Պատմական մատերիալովքը միակ ճըշմարտութիւնն է եւ ուրիշ ճշմարտութիւն չկայ:

Անցած եւ գալի՞ք փիլիսոփայութիւնները, գիտութիւնը եւ կրօնքը, ոչ միայն սխալ են, այլ նաեւ դատապարտելի:

Մարդկութիւնը բաժանում է երկու մասի՝ քաղաքացիներ եւ ընկերներ:

Քաղաքացիները պարտաւոր են որեւէ պրոֆիտիւթեան անդամ լինել, թէ չէ մարդ չեն, բոլոր իրաւունքներից զրկուած են եւ ընկերութեան մաս չեն կազմում: Կանոնաւոր կերպով պէտք է յաճախեն ժողովները, թերթ ստանան, ծափահարեն իշխանութեան առած բոլոր քայլերին, կօօպերատիւններից ապրանք գնեն, շքերթներին մասնակցին եւ Գործկոմի նախագահի առջեւից անցնելու ժամանակ հուռա՛ պոռան:

Ընկերները կուսակցութեան անդամ են: Մարքսիզմի մասին զբաժ բրոշիւրներին ծանօթ: Ժողովներ: Կարգապահութիւն: Իրաւունք ունին տարձանակ կրելու: Պարտաւոր են իշխանութեան դադափարախօսութեան դէմ մեղանչողներին լրտեսել: Մատնութիւնը՝ քաղաքործութիւն է: Լաւ պաշտօններ, ոտճիկ: Միշտ Կ. Կ.ի տրամադրութեան տակ են: Շարաթը մի անգամ հրացանը ուսերին՝ մարզանք: Մէկ մէկի եւս լրտեսել: Ճտուեր արտասանել: «Դուք այս երկրի տէրն էք»:

Եւ ընկերային կեանքը ժամացոյցի նման լարուած է:

Կազմակերպութիւններ: Գիտութիւնը եւ անհասարակ միտքը, հաւերի պէս վանդակների մէջ փակուած են: Առեւտուրը կազմակերպուած: Բանաստեղծութիւնը եւ զրականութիւնը պէտք է ծառայեն պրոլետարիատին: Զգացումները՝ շղթայուած: Ոգեւորութիւնը՝ չարիաւոր եւ պատճառաբանուած: Դեղօրայքը ձրի եւ հիւանդութիւնը՝ առատ:

Զանգը տալիս են, «գիւղը» ժողովուում է սեղանատուն:

— Մենք յոգնա՛ծ ենք որբ լինելուց:

* * *

Վեց դարուց ի վեր մենք որբ ենք: Մեր հոգեբանութիւնը՝ զրխտոնեայ աշխարհը ե՞րբ պիտի գայ, Ինկիլիդը ե՞րբ պիտի գայ, Ֆրանկը ե՞րբ պիտի գայ... . Եւրոպա՛ն, Եւրոպա՛ն... .

Այսօր՝ կարմիր Մոսկուան: